

韓偓字致堯一字致光京兆萬年人龍紀進士後
王溥薦爲翰林學士遷中書舍人從幸鳳翔進
兵部侍郎朱全忠惡之貶濮州司馬天祐中復
召入偓挈家南依王審知卒號玉山樵人有詩
集一卷又香奩集一卷

和魯公凝有艷詞一編名香奩集凝後貴乃嫁其
名爲韓偓今世傳韓偓香奩集乃凝所爲也凝
生平著述分爲演淪遊藝孝弟疑獄香奩籛金
集因爲遊藝集叙云予向有香奩籛金二集不

行于世凝在政府避議論諱其名又欲後人知
故于遊藝集序實之此凝之意也予在秀州其
曾孫和惇家藏諸書皆魯公舊物未有印記甚
完 右見沈存中夢溪筆談

唐翰林學士中書舍人韓致光香奩集目錄

賦

黃蜀葵花賦

紅蕉賦

歌行

厭花落

寄遠

南浦

四言

春晝

五言律

幽窓

馬上見

欲去

信筆

薦福寺

個儂

荷花

半夜

五言排律

春閨十二韻

別緒

懶起

無題三首

倒壓前韻一首

七言律

春盡

見花

青春

橫塘

五更

詠浴

席上有贈

倚醉

詠手

擁鼻

晝寢

偶見背面是夕兼夢

有憶

袅娜

多情

偶見

閨情

代小玉家

惆悵

後魏時相人作

意緒

七言排律

妬媒

五言絕

半睡

早歸

效崔國輔體三首

春閨二首

兩處

六言絕句

無題

七言絕句

已涼

詠燈

聯綴體

夜深

哭花

重遊曲江

遙見

新秋

宮詞

寒食夜

新上頭

夏日

中庭

鬆髻

寄恨

蹤跡

病憶

不見

忍笑

偶見

寒食夜有寄

寒食日重遊二首

思錄舊詩

復偶見三首

再青春

閨恨

荔枝三首

深院

江樓二首

遶廊

屐子

踏青

密意

聞雨

詠柳

雜言

玉合

金陵

詞

三憶

浣溪沙二首

生查子

懶卸頭

五更




原件短缺

唐翰林學士中書舍人韓致光香奩集

賦

黃蜀葵花賦



色配中央心傾太陽布葉近隣於玉砌移根遠自
於銅梁萼綠華未見楊羲冠簪駮駮杜蘭香喜逢
張碩巾帔飄揚銀漢之星機欲曙金臺之漏箭初
長動人妖艷馥鼻生香千里鵠鷓濫得名于太液
三秋菊蕊虛長價於柴桑送日微困迎風欲翔周
昉神疲吮筆而深慙思拙江淹色退擘箋而所恨

才荒蝶翅堪憎蜂鬚可妬幾多之金粉遭竊一點
之檀心被污何須逼視漢夫人之鴛寢多羞不待
貪鹽晉天子之羊車自駐激電寒暄跳丸烏兔得
不勝淹留勞願慕懊惱張京兆唯將桂葉添眉悵
望齊東昏却把蓮花襯步騷人易老絕色多愁曷
忍在綺窓側畔當繡戶前頭目斷猶駐魂消未收
映葉而自擊歌扇偎欄而若墮粧樓感荀粲之殷
勤誓無緘著怨謝鯤之強暴未近風流清晝鶯啼
黃昏客散鶴頸兮長引猿腸兮屢斷攀條立處林

烏應笑於後棲欹枕看時梁燕或聞於長嘆

紅蕉賦

瞥見紅蕉魂隨魄消陰火與朱華共映神霞將日
脚相燒謝家之麗句難窮多烘繭紙洛浦之下裳
頻換剩染鮫鮓鶴頂詎侔鷄冠豈擬蘭浥露而姝
忝楓經霜而莫比趙合德裙間一點願同白玉唾
壺鄧夫人額上微殷却賴水晶如意森森巘巘脉
脉亭亭倩玉之磋來若指輕雲之剪出如屏鶯舌
無端妬含桃而未咽猩唇易染黼浮蟻以難醒在

物無雙於情可溺橫波接紅臉之豔含貝發朱唇
之色僧虔蜜炬爍桂棟以難藏潘岳金釭敞綉幃
而不隔大凡人之麗者必動物物之尤者必移人
不言而信其速如神所以月彩下蟻珠之水梅酸
生鶴唳之津寧關巧運自合天真有影先知無聲
已認體踈而意密迹遠而情近天穿地朽幾人謂
絕色難逢萬古千秋唯我睽紅英不盡

歌行

厭花落

厭花落人寂寞果樹陰成燕翅齊西園永日閒高
閣後堂夾簾垂不卷低頭慢把衣襟撚忽然事到
中心來四肢嬌入茸茸眼也曾同在華堂宴佯羞
背攏偷回面半醉狂心忍不禁分明一任傍人見
書中說却平生事猶疑未滿情郎意錦囊封字又
重開夜深窓下燒紅紙紅紙千張言不盡至誠無
語傳心印但得鴛鴦一作衾枕臂眠也任時光都一

瞬

寄遠

眉如半照雲如髮梧桐葉落敲井欄孤燈亭亭公
署寒微霜淒淒客衣單想佳人兮雲一端魂夢悠
悠關山難空牀展轉懷悲酸銅壺漏盡開金鸞

南浦

月若半環雲若吐高樓簾卷當南浦應是石城艇
子來兩槳咿呀過花塢正值連宵酒未醒不宜此
際兼微雨直教筆底有文星亦應難狀分明苦

四言

春晝

春融艷艷大醉陶陶漏添永日箭減良宵藤垂戟
戶柳拂浮橋簾幕燕子池塘百勞膚清臂瘦衫薄
香消楚殿衣窄南朝髻高河陽縣遠清波地遙絲
纏露泣各自無慘

五言律

幽牕

刺繡非無暇幽牕自欸歡手香江橘嫩齒軟越梅
酸密約臨行怯私書欲寄一作報難無憑語鵲語猶
得暫心寬

馬上看

騎馬錦連乾乘騎是謫仙和裙穿玉鐙隔袖把金鞭去帶情騰醉歸因困頓眠自憐輸廐吏餘爔在香鞵

欲去

紛紜隔窓語重約踏青期縱得相逢處無非欲去時恨深書不盡寵極意多疑惆悵桃源路誰教夢寐知

信筆

睡髻休頻攏春眉忍更長整釵梳子重汎酒菊花香繡疊昏金色羅揉損研光有時閒弄筆亦畫兩鴛鴦

薦福寺講筵偶見又別

見時濃日午別處暮鐘殘景色疑春盡襟懷似酒闌兩情含眷戀一餉致辛酸夜靜長廊下誰尋屐齒看

個儂

甚感殷勤意其如阻碍何隔簾窺綠齒映柱送橫

波老大逢知少襟懷暗喜多因傾一樽酒聊以慰
蹉跎

荷花

鈿扇相欹綠香囊獨立紅浸滌因重露狂暴是秋
風逸調無人唱秋塘每夜空何由見周昉移入畫
屏中

半夜

板閣數樽後至今猶酒盃一宵相見事半夜獨眠
時明朝總下照應有髮如絲

五言排律

春閨十二韻

一作春悶

阡陌懸雲壤欄畦隔艾芝路遙行雨懶河濶過橋
遲鴈足應難達狐踪浪得疑謝鯤吟未廢張碩夢
堪思有意通情處無言攏髻時格高歸歛笑歌怨
在顰眉醉後金蟬重歡餘玉燕欹素姿凌白柰圓
頰銷紅梨粉字題花筆香箋詠柳詩繡窓攜手約
芳草踏青期別淚開泉脉春愁罨藕絲相思不相
信幽恨更誰知

別緒

別緒靜悄悄牽愁暗入心已迴花渚棹悔聽酒壚
琴菊露淒羅幕梨霜惻錦衾此生終獨宿到死誓
相尋月好知何計歌闌歎不禁山頭更高處憶上
上頭吟

懶起

百舌喚朝眠春心動幾般臉霞紅黯澹淚粉玉闌
珊繡籠香烟歇屏山燭燄殘煖嫌羅襪窄瘦覺錦
衣寬昨夜三更雨臨明一陣寒海棠花在否側卧

卷簾看

無題二首

并序

余自辛酉歲作無題十四韻故奉常王公相國
首於繼和故內翰吳侍郎融令狐舍人渙閣下
劉舍人崇譽吏部王員外渙相次屬和余因作
第二首却寄諸公二內翰及小天亦再和余復
作第三首二內翰亦三和王公一首劉紫微一
首王小天一首二學士各三首余又倒押韻成
第四首二學士笑謂余曰謹豎降旗何妍如是

也遂絕筆是歲十月末余在內直一旦兵起隨
駕西狩文藁咸棄更無孑遺丙寅年九月在福
建寓止有前東都度支院蘇暉端公挈余淪落
詩藁見授中得無題一首因追味舊作缺忘甚
多唯第二第四首彷彿可記其第三首才得數
句而已今亦依次編之以俟他時偶獲餘五人
所和不復憶省矣

小檻移燈地空房鎖隙塵額波風度日簾影月侵
晨香瓣更衣後釵梁攏髻新告音聞詭計醉語近
天真粧好方長歎歡餘却淺顰繡屏金作屋絲幃
玉爲輪致意通絲竹精誠托錦鱗歌凝眉際恨酒
發臉邊春淡苧殊輕越樓簫豈羨秦柳虛攘沴氣
梅實引芳津樂府降新唱宮厨減食珍防閑襟并
歛忍妬淚休勻宿飲愁縈夢春寒瘦看人手持雙
豆蔻的的爲東鄰

二

若在偏光日紅簾不受塵柳昏連綠野花爛爍清
晨書密偷看數情通破體新明言終未實暗祝始

應真枉道嫌偷藥推誠鄙效顰合成雲際彩宜作
日中輪爐獸金塗爪釵魚玉鏤鱗渺瀰三島浪平
遠一樓春墮髻還名壽脩蛾本姓秦棹尋聞犬洞
槎入飲牛津麟脯隨重釀霜華間八珍錦衾霞彩
爛羅襪研光勻羞澁佯牽伴嬌嬈欲泥人偷兒難
捉搦慎莫共比鄰

三

紫蠟融花蒂紅綿拭鏡塵夢狂翻惜夜粧懶厭凌
晨茜袖啼痕數香箋墨色新

此後失記

四 倒壓前韻

白下歸同路烏衣住作鄰珮聲猶隔箔香氣已迎
人酒勸盃須滿書羞字不勻歌憐黃竹怨味實碧
桃珍剪燭非良策當關是要津東河初度洛楊暉
舊家秦粉化橫波溢衫輕曉霧春鴉黃雙鳳翅麝
片半魚鱗引袂翻如浪回腸轉若輪後期纔注脚
前事又含顰縱有才難詠寧無畫逼真天香聞更
有瓊樹見長新鬪草常更僕迷闔誤達晨嗅花判
不得檀注惹芳塵

七言律

春盡

樹頭初日照西簷
樹底鶯花夜雨霑
外院池亭聞動鎖
後堂欄檻見垂簾
柳腰入戶風斜倚
榆筴堆墻水半淹
把酒送君惆悵在
年年三月病厭厭

見花

褰裳擁鼻正吟詩
日午墻頭獨見時
血染蜀羅山躑躅
肉紅宮錦海棠梨
因狂得病真閑事
欲詠無才是所悲
看却東風歸去疾
爭教判得最繁枝

青春

眼意心期卒未休
暗中終擬約秦樓
光陰負我難相偶
情緒牽人不自由
遙夜定嫌香蔽膝
悶時應弄玉搔頭
櫻桃花謝梨花發
腸斷青春兩處愁

橫塘

秋寒酒背入簾霜
鳳脰燈青照洞房
蜀紙麝煤添筆媚
越甌犀液發茶香
風飄亂點更籌轉
拍送繁絃曲
破長散客出門斜
月在兩眉愁思向橫塘

五更

往來曾約鬱金牀
半夜潛身入洞房
懷裏不知金鈿落
暗中惟覺繡鞵一作衣
香此時欲別魂俱斷
自後相逢眼更狂
光景旋消惆悵在
一生贏得是淒涼

詠浴

再整魚犀攏翠簪
解衣先覺冷森森
教移蘭燼頻羞影
自拭香湯更怕深
初似染花難抑按
終憂沃雪不勝任
豈知侍女簾幃外
賸取君王數餅金

席上有贈

矜嚴標格絕嫌猜
嗔怒難逢笑眼開
小鴈斜侵眉柳去
媚霞橫接眼波來
鬢垂香頸雲遮藕
粉着蘭胸雪壓梅
莫道風流無宋玉
好將心力侍粧臺

倚醉

倚醉無端尋舊約
却令惆悵轉難勝
靜中樓閣深春雨
遠處簾櫳半夜燈
抱柱立時風細細
遶廊行處思騰騰
分明窓下聞裁剪
敲遍欄干喚不應

詠手

煖白膚紅玉笋
芽調琴抽線露尖斜
背人細撚垂

烟髻向鏡輕勻襯臉霞悵望昔逢褰繡幔依稀曾
見托金車後園笑向同行道摘得薜蘿又一披

擁鼻

擁鼻悲吟一向愁寒更轉盡未回頭綠屏無睡秋
分簾紅葉傷時月午樓却要因循添逸興若爲趨
競愴離憂殷勤馮仗官渠水爲到西溪動釣舟

晝寢

碧桐陰靜隔簾櫳扇拂金蛾玉簾烘撲粉更添香
體滑解衣惟見下裳紅煩襟乍觸冰壺冷倦枕徐

欹寶髻鬆何必苦勞魂與夢王昌只在此墻東

偶見背面是夕兼夢

酥凝背胛玉搓肩輕薄紅綃覆白蓮此夜分明來
入夢當時惆悵不曾眠眼波向我無端艷心火因
君特地然莫道人生難際會秦樓鸞鳳有神仙

有憶

晝漏迢迢夜漏遲傾城消息杳無期愁腸泥酒人
千里淚眼倚樓天四垂自笑計狂多獨語誰憐夢
好轉相思何時斗帳濃香裏分付東風與玉兒

袅娜

袅娜腰肢淡薄粧六朝宮樣窄衣裳着詞但見櫻
桃破飛盞遙聞荳蔻香春惱情懷身覺瘦酒添顏
色粉生光此時不敢分明道風月應知暗斷腸

多情

天遣多情不自持多情兼與病相宜蜂偷崖蜜初
嘗處鶯啄含桃欲咽時酒蕩襟懷微駮駮春牽情
緒更融怡水香剝注金盆裏瓊樹長須浸一枝

偶見

千金莫惜早蓮生一笑從教下蔡傾仙樹有花難
問種御香聞氣不知名愁來自覺歌喉咽瘦去誰
憐舞掌輕小疊紅箋書恨字與奴方便寄卿卿

閨情

輕風滴磔動簾鈎宿酒猶酣懶卸頭但覺夜深花
有露不知人靜月當樓何郎燭暗誰能詠韓壽香
銷亦任偷敲折玉釵歌轉咽一聲聲作兩眉愁

代小玉家爲蕃騎所虜後寄故集賢裴公

動天金鼓逼神州惜別無心學墜樓不得迴眸辭

傅粉便須含淚對殘秋折釵伴妾埋青塚半鏡隨
郎葬杜郵惟有此宵魂夢裏殷勤相覓鳳池頭

惆悵

身情長在暗相隨生魄隨君君豈知被頭不暖空
沾淚釵股欲分猶半疑朗月清風難愜意詞人絕
色多傷離何如飲酒連千醉席地幕夫無所知

後魏時相人作李波小妹歌疑其未備因補
之

李波小妹字雍容窄衣短袖鬢錦紅未解有情夢
梁殿何曾自媚妬吳宮誰教牽引知酒味因令悵
望成春慵海棠花下秋千畔背人撩髻亂匆匆

意緒

絕代佳人何寂寞梨花未發梅花落東風吹雨入
西園銀線千條度虛閣臉粉難勻蜀酒濃口脂易
印髮綾薄妖嬈意緒不勝羞願倚郎肩永相着

七言排律

妬媒

洞房深閉不曾開橫卧烏龍似妬媒好鳥豈勞兼

比翼異花何必更重臺難留旋逐驚飈去瞥見如
隨急電來多爲過房成後悔偶因翻一作語得深
猜已嫌刻蠟春宵短最恨鳴珂曉鼓催應笑楚襄
仙分薄日中長是獨裴裒

五言絕句

半睡

擡照仍嫌瘦更衣又怕寒宵分未歸帳半睡待郎
看

早歸

去是黃昏後歸當朧臙時袂衣吟宿酒風露動相
思

效崔國輔體一

澹月照中夜海棠花自落獨立俯閑階風動秋千
索

二

酒力滋睡眸鹵莽聞街鼓欲明天更寒東風打窓
雨

三

羅暮生春寒繡窗愁未眠夜半南湖雨應濕採蓮船

春閨

願結交加夢因傾漱漣樽醒來情緒惡簾外正黃昏

其二

氤氳帳裏香薄薄睡時粧長吁解羅帶怯見上空牀

兩處

樓上淡山橫樓前溝水清憐山又憐水兩處總牽情

六言絕句

無題

春樓燕子傾城金陵狎客多情朝雲暮雨會合羅襪繡被逢迎

華山梧桐相覆蠻江荳蔻連生幽歡不盡告別秋河悵望平明

一燈前雨落夜三月盡草青時半寒半暖正好花

至
開花謝相思

惆悵空教夢見懊惱多成酒悲紅袖不乾誰會揉
損聯娟澹眉

此間青草更遠不惟空遶汀洲那里朝日纔出還
應先照西樓

憶淚因成恨淚夢遊長續心遊桃源洞口來否絳
節霓旌久留

七言絕句

已涼

碧欄杆外繡簾垂猩血屏風畫折枝八尺龍鬚方
錦褥已涼天氣未寒時

詠燈

高在酒樓明錦幕遠隨漁艇泊烟江古來幽怨皆
銷骨休向長門背雨牕

聯綴體

院宇明秋日日長社前一鴈別遼陽隴頭針線年
年事不喜寒砧搗斷腸

夜深

清江碧草兩悠悠各自風流一種愁正是落花寒
食夜夜深無伴倚空樓

哭花

曾愁香結破顏遲今見妖紅委地時若是有情爭
不哭夜來風雨葬西施

重遊曲江

鞭稍亂拂暗傷情踪跡難尋露草青猶是玉輪曾
碾處一泓秋水漲浮萍

遙見

悲歌淚濕澹臙脂閒立風吹金縷衣白玉堂東遙
見後令人陡薄畫楊妃

新秋

一夜清風動扇愁背時容色入新秋桃花臉裏汪
汪淚忍到更深枕上流

宮詞

繡裙斜立正銷魂侍女移燈掩殿門燕子不來花
着雨春風應是怨黃昏

寒食夜

側側輕寒剪剪風小梅飄雪杏花紅夜深斜搭秋
千索樓閣朦朧細雨中

新上頭

學梳鬆髻試新裙消息佳期在此春爲要好多心
轉惑遍將宜稱問傍人

夏日

庭樹新陰葉未成玉堦人靜一蟬聲相風不動鳥
龍睡時有嬌鶯自喚名

中庭

夜短睡遲慵早起日高方始出紗牕中庭自摘青
梅子先向釵頭帶一雙

鬆髻

髻根鬆慢玉釵垂指點花枝又過時坐久暗生惆
悵事映人勻却淚臙脂

寄恨

秦釵枉斷長條玉蜀紙虛留小字紅死恨物情難
會處蓮花不肯嫁春風

蹤跡

東烏西兔似車輪劫火桑田不復論惟有風光與
蹤跡思量長是暗銷魂

病憶

信知尤物必牽情一顧難酬覺命輕曾把禪機消
此病破除纔盡又重生

不見

動靜防閑又怕疑洋洋脉脉是沉機此身願作君
家燕秋社歸時也不歸

忍笑

宮樣衣裳淺畫眉曉來梳洗更相宜水精鸚鵡欵
頭顛舉袂揚羞忍笑時

偶見

秋千打困解羅裙指點醜醜索一樽見客入來和
笑走手搯梅子映中門

寒食夜有寄

風流大抵是佺佺此際相思必斷腸雲薄月昏寒
食夜隔簾微雨杏花香

寒食日重遊李氏林亭有懷一

傷心濶別三千里屈指思量四五年料得他鄉過
佳節亦應懷抱暗凄然

二

往年同在鸞橋上見倚朱欄詠柳綿今日獨來香
徑裏更無人跡有苔錢

思錄舊詩於卷上悽然有感

緝綴小詩抄卷裏尋思閒事到心頭自吟自泣無
人會腸斷蓬山第一流

復偶見一

霧爲襟袖玉爲冠半似羞人半忍寒別易會難長
自歎轉身應把淚珠彈

二

桃花臉薄難藏淚柳葉眉長易覺愁密約未成當
面笑幾回擡眼又低頭

三

半身映竹輕聞語一手揭簾微轉頭此意別人應
未覺不勝情緒兩風流

再青春

兩重門裏玉堂前
寒食花枝月午天
想得那人垂手立
嬌羞不肯上秋千

閨恨

時光潛去暗思量
懶對菱花暈曉粧
初拆秋千人寂寞
後園青草任他長

荔枝一

遐方不許貢珍奇
密詔惟教進荔枝
漢武碧桃爭比得
枉令方朔號偷兒

二

封開玉籠鷄冠濕
葉襯金盤鶴頂鮮
想得佳人微露齒
翠釵先取一枝懸

三

巧裁絳片裹神漿
崖蜜天然有異香
應是仙人金掌露
結成冰入茜羅囊

深院

鵝兒唼噠嬌黃角
燕子輕盈膩粉腰
深院下簾人晝寢
紅薔薇架碧芭蕉

江樓二首

夢啼嗚咽覺無語杳杳微微望烟浦樓空客散燕
交飛江靜帆稀日亭午

二

鮒魚苦笋香味新楊花酒旗三月春風光百計牽
人老爭柰多情足病身

遶廊

濃烟隔簾香漏泄斜燈映竹光參差遶廊倚柱堪
惆悵細雨輕寒花落時

屐子

六寸膚圓光緻緻白羅繡屨紅花裏南朝天子欠
風流却重金蓮輕綠齒

踏青

踏青會散欲歸時金車久立頻催上收裙整髻故
遲留兩點深心各惆悵

密意

呵花貼髻粘寒髮凝酥光透猩猩血經過洛水幾
多人惟有陳王見羅襪

聞雨

香侵蔽膝夜寒輕聞雨傷春夢不成羅帳四垂紅
燭背玉釵敲着枕函聲

詠柳

裊雨拖風不自持全身無力向人垂玉纖折得遙
相贈便是觀音手裏時

雜言

玉合

羅囊繡兩鳳凰玉合雕雙鷓鴣中有蘭膏漬紅豆
每迴拈着長相憶長相憶經幾春人悵望香氣氤

開緘不見新書跡帶粉猶殘舊淚痕

金陵

風雨蕭蕭石頭城下木蘭橈烟月迢迢金陵渡口
去來潮自古風流皆暗銷才鬼妖魂誰與招綵箋
麗句今已矣羅襪金蓮何寂寥

詞

三憶

憶眠時春夢困騰騰展轉不能起玉釵垂枕稜
憶行時背手移金雀欵笑慢回頭步轉闌干角

到六
憶去時向月遲遲行強語戲同伴圖郎聞笑聲

浣溪沙一

攏髻新妝玉步搖背燈偷解繡裙腰枕寒衾冷異
香消 深院不關春寂寂落花和雨夜迢迢恨情
殘醉却無憀

二

宿醉離愁慢髻鬟六銖衣薄惹輕寒慵紅悶翠掩
青鸞 羅襪况兼金齒替雪肌仍是玉琅玕骨香
腰細更沉檀

生查子二首

懶卸頭

侍女動粧奩故故驚人睡那知猶未眠背面偷垂
淚 懶卸鳳凰釵羞入鴛鴦被時復見殘燈和烟
墜金穗

五更

秋雨五更頭桐竹鳴騷屑却似殘春間斷送花時
節 空樓鴈一聲遠屏燈半滅繡被擁嬌寒眉山
正愁絕

雲陽姜道生重生父校刊

新都潘最 懋卿父全校

香奩集終



